



分類補註李太白詩卷之二十五

題一十二首

題隨州紫陽先生壁

神農好長生風俗久已成復聞紫陽客卑署  
丹臺名喘息食妙氣步虛吟真聲道與古仙  
合心將元化并樓疑出蓬海鶴似飛玉京松  
雪牕外曉池水階下明忽耽笙歌樂頗失軒  
冕情終願惠金液提携凌太清

齊賢曰抱朴子曰金液太



一所服而仙者太清天也蓬海玉京山見前

### 題元丹丘山居

故人棲東山自愛丘壑美青春卧空林白日  
猶不起松風清襟袖石潭洗心耳美君無紛  
喧高枕碧霞裏

### 題元丹丘穎陽山居

并序

丹丘家于穎陽新卜別業其地北倚馬嶺  
連峯尚丘南瞻鹿臺極目汝海雲巖映鬱

有佳致焉白從之遊故有此作

仙遊渡穎水訪隱同元君忽遺蒼生望獨與  
洪崖群卜地初晦跡興言且成文却顧北山  
斷前瞻南嶺分遙通汝海月不隔尚丘雲之  
子合逸趣而我欽清芬舉跡倚松石談笑迷  
朝曛益願狎青鳥拂衣棲江濱

齊賢曰穎水洪崖見前

### 題瓜州新河錢族叔舍人賁

齊公鑿新河萬古流不絕豐功利生人天地

同朽滅兩橋對雙閣芳樹有行列愛此如甘  
棠誰云敢攀折美關倚此固天險自茲設海  
水落斗門湖平見沙汭我行送季父弭棹徒  
流悅楊花滿江來疑是龍山雪惜此花下興  
愴與山陽別瞻望清路塵歸來空寂滅士贇曰毛  
詩甘棠美召伯也召伯之教明於南  
國蔽芾甘棠勿剪勿伐召伯所茨

### 洗脚亭

白道向姑熟洪亭臨道傍前有昔時井下有

五丈牀樵女洗素足行人歇金裝西望白鷺  
洲蘆花似朝霜送君此時去回首淚成行一作

雙

### 勞勞亭

天下傷心處勞勞送客亭春風知別苦不遣

柳條青

齊賢曰輿地志秣陵縣新亭隴有勞勞樓宋改為臨滄觀行人分別之所

題金陵王處士水亭

此亭齊朝南苑又晉陸機故宅

王子耽玄言賢豪多在門好鵝尋道士愛竹

嘯名園樹色老

一作秀

荒苑池光蕩華軒此堂

見明月更憶陸平原掃地青玉簾為余直金

樽醉罷

一作後

欲歸去花枝宿鳥喧何時復來

此再得洗囂煩

齊賢曰好鵝愛竹事見前平原陸機也事亦見前

題嵩山逸人元丹丘山居

并序

白久在廬霍元公近遊嵩山故交深情出

處無間函信頻及許為主人欣然適會本

意當冀長往不返欲便舉家就之兼書其

遊因有此贈

家本紫雲山道風未淪落沉懷丹丘志冲賞

歸寂寞竭來遊閩荒捫涉窮禹鑿寅緣泛潮

海偃蹇陟廬霍憑雷躡天窓弄影憇霞閣且

欣登眺美頗愜隱淪諾

齊賢曰唐閩州長樂郡開元十三年更名

福州治閩縣即西漢閩粵王閩中郡之地類

海荒服故曰閩荒廬山隸江州霍山即舒之

鎮桓子新論天下神人五二曰隱淪 幽期四岳聊所託故人契嵩穎高義炳丹臚

滅跡遺紛蠶終言本峯壑自矜林湍好不羨  
朝市樂偶與真意并頓覺世情薄爾能折芳  
桂吾亦採蘭若拙妻好乘鸞嬌女愛飛鶴提  
携訪神仙從此鍊金藥

齊賢曰三山三神山也四岳恒華泰衡也

題江夏脩靜寺

此寺是李伯海舊宅

我家北海宅作寺南江濱空庭無玉樹高殿

坐幽人書帶留青草琴堂

一作臺

幕素塵平生

種桃李寂滅不成春

齊賢曰李邕爲北海太守天寶中爲吉温所陷

而殺之於郡代宗贈秘書監國史異纂雲陽  
界多漢離宮故地有樹似槐而細葉土人謂  
之玉樹三齊記鄭康成常居南山中教授  
山下草如薤葉長尺許時人名爲書帶草

改九子山爲九華山聯句

并序

青陽縣南有九子山山高數千丈上有九  
峯如蓮花按圖徵名無所依據太史公南  
遊略而不書事絕古老之口復闕名賢之  
紀雖靈仙往復而賦詠罕聞予乃削其舊  
號加以九華之目時訪道江漢憇于夏侯

迴之堂開簷岸幘坐眺松雪因與二三子  
聯句傳之將來

妙有分二氣靈山開九華李白曾標過遲日半

壁明朝霞高齊積雪曜陰壑飛流歆陽崖韋權輿

一作青熒玉樹色縹緲羽人家李白士贇曰

一王弼注曰一數之始而物之極也謂之為

妙有者欲言有不見其形則非有故謂之妙

欲言其無則物由以生則非無故謂之有也

斯乃無中之有謂之妙有也銑曰青熒光也

題宛溪館

吾憐宛溪好百尺照心明一作久照可謝新

安水千尋見底清白沙留月色綠竹助秋聲

却笑嚴湍上于今獨擅名齊賢曰宛陵隸宣州嚴湍見前

題東谿公幽居

杜陵賢人清且廉東谿卜築歲將淹宅近青

山同謝眺門垂碧柳似陶潛好鳥迎春歌後

院飛花送酒舞前簷客到但知留一醉盤中

祇有水晶鹽齊賢曰太白傳曰晚好黃老渡牛渚磯至姑熟悅謝家青山欲

居焉故云宅近青山陶潛門前有  
五柳因作五柳先生傳以自况

雜詠 一十六首

嘲魯儒

魯叟談五經白髮死章句問以經濟策茫如  
墜煙霧足著遠遊履首戴方山中緩步從直  
道未行先起塵秦家丞相府不重褒衣人君  
非叔孫通與我本殊倫時事且未達歸耕汶  
水濱齊賢曰後漢志方山冠似進賢以五綵  
穀為之秦紀丞相斯請史官非秦記皆

燒之非博士官所職天下敢有藏詩書百家  
語者悉請守尉雜燒之士贊曰叟長老之通  
稱叔孫通起朝儀徵魯諸生三十餘人魯有  
兩生不肯行通笑曰若真鄙儒不通時變

懼讒

二桃殺三士詎假劔如霜眾女妬娥眉雙花  
竟春芳魏姝信鄭褒掩袂對懷王一惑巧言  
子朱顏成死一作相傷行將泣團扇戚戚愁人  
腸齊賢曰戰國策魏王遺楚王美人楚王悅  
之夫人鄭褒知王之悅新人也甚愛新人  
衣服玩好擇其所喜而為之愛之甚於王王  
曰婦人之所以事夫者色也而妬者其情也



今鄭褒知寡人之悅新人其愛之甚於寡人  
此忠臣之所以事君也鄭褒知王以已為不  
如也因謂新人曰王愛子美矣雖然惡子之  
鼻子見王則必掩鼻子新人見王因掩其鼻  
王謂鄭褒曰何也褒曰其似聞君王之臭也  
王曰悍哉令刺之無使逆命成帝初即位班  
婕妤選入宮為婕妤後幸趙飛燕婕妤失寵  
擬古怨歌行曰裁成合歡扇團圓似明月棄  
捐篋笥中恩情中道絕士  
贊曰二桃殺三士見前卷

### 觀獵

太守耀清威乘間弄晚暉江沙橫獵騎山火  
遶行圍箭逐雲鴻落鷹隨月兔飛不知白日

### 暮歡賞夜方歸

#### 觀胡人吹笛

胡人吹玉笛一半是秦聲十月吳山曉梅花  
落敬亭愁聞出塞曲淚滿逐臣纓却望長安

### 道空懷戀主情

齊賢曰李斯云擊甕叩缶彈  
箏搏髀而呼烏烏快耳者真

秦聲也敬亭山見前落梅花羞笛曲也張博  
望傳其法於西涼得摩訶兜勒一曲李延年  
因之思造新聲二十八解乘輿以為武樂嘗  
給邊將魏晉以後二十八解不存所用者唯  
黃鶴嶺頭水出關入塞折楊柳黃  
潭子赤之楊望行人十四曲也士贊曰太白

放逐之餘眷戀宗國之意隨寓而發觀此詩末三句槩可見矣

### 軍行

騮馬新跨

一作誇

白玉鞍戰罷沙場月色寒城

頭鐵鼓聲猶震匣裏金刀血未乾

齊賢曰毛詩註赤身

黑鬃曰騮

### 從軍行

百戰沙場碎鐵衣城南已合數重圍突營射

殺呼延將獨領殘兵千騎歸

齊賢曰薛收曰匈奴署各種單

于有王號者十六等左右賢王四姓曰呼延氏十氏蘭氏喬氏呼延號曰逐世為輔相

### 平虜將軍妻

平虜將軍婦入門二十年君心自不悅妾寵

豈能專出解牀前帳行吟道上篇古人不唾

井莫忘昔纏綿

### 春夜洛城聞笛

誰家玉笛暗飛聲散入春風滿洛城此夜曲

中聞折柳何人不起故園情

齊賢曰折柳曲名

嵩山採菖蒲者

神仙多苦貌雙耳下垂肩嵩嶽逢漢武疑是  
九疑仙我來採菖蒲服食可延年言終忽不  
見滅影入雲煙喻帝竟莫悟終歸茂陵田齊賢  
曰此篇是詠仙人王興詩語乃隳括其傳中  
事神仙傳王興者城陽人居壺谷中不知書  
無學道意漢武上嵩山登大愚石起道宮使  
董仲舒東方朔徐樂思神至夜半忽有仙人  
長二丈耳出頭巔下至肩漢武禮而問之仙  
人曰吾九歲之人聞中嶽石上菖蒲一寸九  
節可以服之長生故來採耳忽生所在帝顧  
待臣曰彼非復學道服食者必中嶽之神以

服耳為之採菖蒲服之經三年帝覺悶而  
不快遂止時從官多服然莫能持久唯王興  
聞仙人告武帝服乃採服之  
不息遂得長生武帝葬茂陵

金陵聽韓侍御吹笛

韓公吹玉笛倜儻流英音風吹繞鍾山萬壑  
皆龍吟王子停鳳管師襄掩瑤琴餘韻度江

去天涯安可尋齊賢曰長笛賦龍吟水中不  
見已截竹吹之聲相似王子

晉吹笙作鳳鳴士贇曰家語孔子學琴於師  
襄子襄子曰吾雖擊磬以為官然能於琴

流夜郎聞酺不預

北闕聖人歌太康南冠君子竄遐荒漢酺聞  
奏鈞天樂願得風吹到夜郎齊賢曰光武紀  
大酺註漢律三  
人以上群飲罰金四兩今賜得令聚會飲五  
日酺布也士贇曰鈞天廣樂南冠君子見前  
放後遇恩不霑

天作雲與雷霈然德澤開東風日本至白雉  
越裳來獨棄長沙國三年未許回何時入宣  
室更問洛陽才齊賢曰易雲雷屯君子以經  
綸周公相成王越裳氏重譯  
獻白雉史賈誼為長沙王太傅歲餘徵見文  
帝受釐坐一旦室因感鬼神事而問鬼神之本

### 宣城見杜鵑花

蜀國曾聞子規鳥宣城還見杜鵑花一叫一

迴腸一斷三春三月憶三巴

齊賢曰成都記  
杜宇自天而降

稱望帝好稼穡勸人務農至今蜀人將農必  
先祠杜宇又望帝死其魂化為鳥名曰杜鵑  
亦曰子規時適三月子規鳥鳴故蜀人悲子  
規鳥潤州鶴林寺杜鵑花高丈餘今江南處  
處有之俗名映山紅

### 白田馬上聞鶯

黃鸝啄紫椹五月鳴桑枝我行不記日誤作

陽春時蠶老客未歸白田已繰絲驅馬又前  
去捫心空自悲悲一作嗤

三五七言

秋風清秋月明落葉聚還散寒鴉棲復驚相

思相見知何日此時此夜難為情齊賢曰自古無此體自

太白始

雜詩

白日與明月晝夜尚一作常不閑況爾悠悠人

安得久世間傳聞海水上乃有蓬萊山玉樹  
生綠葉靈仙每登攀一食駐玄髮再食留紅  
顏吾欲從此去去之無時還齊賢曰蓬萊玉樹見前卷

閨情五十五首

寄遠十二首

三鳥別王母銜書來見過斷腸若剪絃其如  
愁思何遙知玉牕裏織手弄雲和奏曲有深  
意青松交女蘿寫水山中井同泉豈殊波秦

心與楚恨皎皎為誰多齊賢曰三青鳥玉母使也事見前樂書曰自古善琴者八十餘家一十八樣寔之雅度不過伏犧大舜夫子靈關雲得五等而已

其二

青樓何所在乃在碧雲中寶鏡掛秋水一作月

羅衣輕春風新粧坐落日悵望金錦一作屏空

念此一作剪送短書願因雙飛鴻

其三

本作一行書慙勤道相憶一行復一行滿紙

情何極瑤臺有黃鶴為報青樓人朱顏凋落

盡白髮一何新自知未應還離居一作君經三

春桃李今若為當惣發光彩莫使香風飄留

與紅芳待齊賢曰瑤臺青樓見前

其四

玉筋落春鏡坐愁湖陽水聞與陰麗華風煙

接鄰里青春已復過白日忽相催但恐荷花

晚令人意已摧相思不惜夢日夜向陽臺齊賢

曰玉筋淚也湖陽後漢南陽郡光武陰皇后諱麗華南陽新野人初光武適新野聞后美心悅之嘆曰娶妻當得陰麗華巫山陽臺事見前

其五

遠憶巫山陽花明淶江暖躊躇未得往淚向南雲滿春風復無情吹我夢魂斷不見眼中人天長音信短

其六

陽臺隔楚水春草生黃河水一作陰雲隔楚水轉蓬落渭河相

思無日夜浩蕩若流波流波向海去欲見終無因一作定饒珠江濱遙將一點淚遠寄如花人

其七

妾在春陵東君居漢江島一日望花光往來成白道一作日日采藤蕪上山成白道一為雲雨別此地生

秋草秋草秋蛾飛相思愁落暉何由一相見

滅燭解羅衣一本暉下云昔時携手去今時流淚歸遙知不得意玉筋點羅

衣齊賢曰春陵漢江見前

其八

憶昨東園桃李紅碧枝與君此時初別離金  
瓶落井無消息令人行歎復坐思坐思行歎  
成楚越春風玉顏畏銷歇碧認紛紛下落花  
青樓寂寂空明月兩不見但相思空留錦字  
表心素至今緘愁不忍窺

其九

長短春草綠綠階如有情卷施心獨苦抽却

死還生覩物知妾意希君種後庭閑時當採

掇念此莫相輕

齊賢曰卷施即本草藁耳注曰蒼耳

其十

魯縞如玉霜筆題月氏書寄書白鸚鵡西海  
慰離居行數雖不多字字有委曲天未如見  
之開緘淚相續淚盡恨轉深千里同此心相  
思千萬里一書直千金

一作云千里若在心齊賢曰

師古曰縞素也曲阜善作尤為輕細月氏西域國名



其十一

美人在時花滿堂美人去後餘空牀牀中繡

被卷一作更不寢至今三載聞餘香一作猶

香亦竟不滅人亦竟不來相思黃葉落白露

濕青苔士贊曰古詩空牀難獨守

其十二

愛君芙蓉嬋娟之艷色色可飡兮難再得憐

君冰玉清迥之明心情不極兮意已深朝

琅玕之綺食夜同鴛鴦之錦衾恩情婉孌忽

為別使人莫錯亂愁心亂愁心涕如雪寒燈

厭夢魂欲絕覺來相思生白髮盈盈漢水若

可越可惜凌波步羅襪美人兮歸去來

莫作朝雲暮雨兮飛陽臺齊賢曰琅玕玉也

曰婉孌存思貌

長信宮

月皎昭陽殿霜清長信宮天行乘玉輦飛燕

與君同更有歡娛處一作別有承恩樂未窮

誰憐團扇妾獨坐怨秋風齊賢曰漢書孝成

昭儀居昭陽舍梁皇后傳註漢儀

### 長門怨二首

天迴北斗挂西樓金屋無人螢火流月光欲

到長門殿別作深宮一段愁士贊曰詩箋云

然令人感思室中久無人故有此物是不足畏乃可以為憂

### 其二

桂殿長愁不記春黃金四屋起秋塵夜懸明

鏡青天上獨照長門宮裏人士贊曰此詩皆

后事以比元宗皇后其意微而婉矣事見前卷註

### 春怨

白馬金羈遼海東羅帷綉被卧春風落月低

軒窺燭盡飛花入戶笑床空

### 代贈遠

妾本洛陽人狂夫幽燕客渴飲易水波由來

多感激胡馬西北馳香驥搖綠絲鳴鞭從此  
去逐虜蕩邊陲昔去有好言不言久離別燕  
支多美女走馬輕風雪見此不記人恩情雲  
雨絕啼流玉筋盡坐恨金閨切織錦作短書  
腸隨回紋結相思欲有寄恐君不見察焚之  
揚其灰手跡自此滅

齊賢曰寶滔為符堅秦州刺史被徙流沙妻蘇

若蘭織錦回文旋圖詩以贈滔宛轉循環讀之詞甚悽惋凡八百四十字

陌上贈美人

一云小放歌行一首在第三此是第二篇

駿馬驕行踏落花垂鞭直拂五雲車美人一  
笑褰珠箔遙指紅樓是妾家

閨情

流水去絕國浮雲辭故關水或戀前浦雲猶  
歸舊山恨君流沙去棄妾漁陽間玉筋夜垂  
流雙雙落朱顏黃鳥坐相悲綠楊誰更攀織  
錦心草草挑燈淚班班窺鏡不自識况乃狂  
夫還

王贊曰此篇是詠寶滔妻蘇氏若蘭錦織作回文詩寄夫事詳見前詩

代別情人

清水本不動桃花發岸傍桃花弄水色波蕩  
搖春光我悅子容艷子傾我文章風吹綠琴  
去曲度紫鴛鴦昔作一水魚今成兩枝鳥哀  
哀長雞鳴夜夜達五曉起折相思樹歸贈知  
寸心覆水不可收行雲難重尋天涯有度鳥

莫絕瑤華音

齊賢曰吳都賦南榴之木相思樹也

伐秋情

幾日相別離門前生櫓葵寒蟬聒梧桐日夕

長鳴悲白露濕螢火清霜凌兔絲空掩紫羅

袂

一作空閨

長啼無盡時

齊賢曰櫓自生稻

鳧葵頭似葵小葉狀似藜有毛抱朴子曰兔絲草下有伏兔之根無此兔則絲不生於上

對酒

蒲萄酒金叵

音頓

羅吳姬十五細馬馱青黛盡

眉紅錦靴道字不正嬌唱歌玳瑁筵中懷裏

醉芙蓉帳裏

一作底

柰君何

怨情

新人如花雖可寵故人似玉由來重花性飄揚不自持玉心皎潔終不移故人昔新今尚故還見新人有故時請看陳后黃金屋寂寂珠簾生網絲齊賢曰金屋貯阿嬌事見前

湖邊採蓮婦

小姑織白紵未解將人語大嫂採芙蓉溪湖千萬重長兄行不在莫使外人逢願學秋胡

婦貞心比古松

齊賢曰爾雅女子謂兄之妻為嫂士贊曰秋胡事見前

怨情

美人捲珠簾深坐顰娥眉但見淚痕濕不知心恨誰

代寄情楚詞體

君不來兮徒蓄怨積思而孤吟雲陽一去已遠隔巫山綠水之沉沉留餘香兮染綉被夜欲寢兮愁人心朝馳余馬於青樓恍若空而

夷猶浮雲深兮不得語却惆悵而懷憂使青  
鳥兮銜書恨獨宿兮傷離居何無情而雨絕  
夢雖往而交踈橫流涕而長嗟折芳洲之瑤  
華送飛鳥以極目怨夕陽之西斜願為連根  
同死之秋草不作飛空之落花

齊賢曰巫山青鳥見前

### 學古思邊

銜悲上隴首腸斷不見君流水若有情幽哀  
從此分蒼茫愁邊色惆悵落日曛山外接遠

天天際復有雲白鴈從中來飛鳴苦難聞足  
繫一書札寄言難離群離群心斷絕十見花  
成雪胡地無春暉征人行不歸相思杳如夢  
珠淚濕羅衣

齊賢曰蘇武傳天子射上林得鴈足有繫帛書隴水事見前

### 思邊

一作春怨

去年何時君別妾南園綠草飛蝴蝶今歲何  
時妾憶君西山白雪暗秦雲玉關去此三千  
里欲寄音書那可聞

齊賢曰玉關事見前

口號吳王美人半醉

風動荷花水殿香姑蘇臺上見吳王西施醉

舞嬌無力笑倚東牕白玉牀

齊賢曰全篇事見前卷

折荷有贈

此與擬古詩內第十一首數字不同故兩存之

涉江翫秋水愛此紅蕖鮮攀荷弄其珠蕩漾不成圓佳人綵雲裏欲贈隔遠天相思無因見惆悵涼風前

代美人愁鏡二首

明明金鵲鏡了了玉臺前拂拭交冰月光輝

何清圓紅顏老昨日白髮多去年鈿粉坐相

誤照來空悽然

齊賢曰神異經有夫婦相別破鏡人各執半以為信其妻

與人通鏡化為鵲飛至夫前夫乃知之後人因鑄鏡為鵲

其二

美人贈此盤龍之寶鏡燭我金縷之羅衣時

將紅袖拂明月為惜普照之餘輝影中金鵲

飛不滅臺下青鸞思獨絕藁砧一別若箭弦

去有日來無年狂風吹却妾心斷玉筋并墮

菱花前

齊賢曰唐記云天寶三載五月初五日揚州進水心鏡一面縱橫九寸青

瑩耀日背有盤龍長三尺四寸五分勢如生動元宗異之進鏡官揚州參軍李才泰曰鑄鏡時有老人自稱曰龍名護有一童名玄冥至謂鏡匠呂暉曰老人解造真龍欲為制之遂令玄冥入爐高閉戶牖三日夜門開呂暉等搜覓已失所在鏡爐前獲書曰盤龍盤龍隱於鏡中分時有象變化無窮興雲吐霧行雨生風玉筋淚也菱花鏡也

### 贈段七娘

羅襪凌波生網塵那能得計訪情親千杯綠

酒何辭醉一面紅菱惱殺人

### 別內赴徵三首

王命三徵去未還明朝離別出吳關白玉高

樓看不見相思須上望夫山

齊賢曰姑熟望夫山見前

### 其二

出門妻子強牽衣問我西行幾日歸歸時儻

佩黃金印莫學蘇秦不下機

齊賢曰蘇秦妻不下機事見前

### 其二



翡翠為樓金作梯誰人獨宿倚門啼夜坐寒  
燈連曉月行行淚盡楚關西齊賢曰楚關西即武關在楚西  
者界

秋浦寄內

我今尋陽去辭家千里餘結荷捲水宿却寄  
大雷書雖不同辛苦愴離各自居我自入秋  
浦三年北信踈紅顏愁落日白髮不能除有  
客自梁苑手携五色魚開魚得錦字歸問我

何如江山雖道阻意合不為

殊

齊賢曰尋陽郡志大雷口

去舒州望江縣三十里秋浦梁苑魚錦字並見前王贊曰大雷書是書鮑照登大雷岸與妹書事按所書曰吾自發寒雨全行日少加秋潦浩汗山溪張至度斤思邊劍徑遊棧石星飯結荷衣水宿旅食貧辛波略壯闊始以今日食時僅及大雷塗登千里日踰十晨嚴霜添節悲風斷鵬去親為客如何如何

自代內贈

寶刀裁流水無有斷絕時妾意逐君行纏綿  
亦如之別來門前草秋巷春轉碧掃盡更還

生萋萋滿行跡鳴鳳始何得雄驚雌各飛遊  
雲落何山一往不見歸估客發大樓知君在  
秋浦梁苑空錦衾陽臺夢行雨妾家三作相  
失勢去西秦猶存舊歌管淒清聞四鄰曲度  
入紫雲啼無眼中人妾似井底桃開花向誰  
笑君如天上月不肯一迴照窺鏡不自識別  
多憔悴深安得秦吉了爲人道寸心此太白自道也

齊賢曰大樓山隸宣城秋浦梁苑陽臺行雨曲度入紫雲事並見前秦吉了出邕及占城

即結遼鳥能言勝於鸚鵡黑色兩眉獨黃

### 秋浦感主人歸燕寄內

霜凋楚關木始知殺氣嚴寥寥金天廓婉婉  
綠紅潛胡燕別主人雙雙語前簷三飛四迴  
顧欲去復相瞻豈不戀華屋終然謝珠簾我  
不及此鳥遠行歲已淹寄書道中歎淚下不

能緘齊賢曰陽廣記曰胡燕曾斑聲小珠簾見前士贇曰月令仲秋之月殺氣浸盛孟秋之月黃帝少皞註曰少皞金天氏

送內尋廬山女道士李騰空二首

君尋騰空子應到碧山家水春雲母確風掃

石楠花若戀幽居好相邀弄紫霞齊賢曰本草雲母久

服輕身延年生泰山山谷石楠生華陰山谷葉狀如枇杷

其二

多君相門女學道愛神仙素手掬青靄羅衣

曳紫煙一往屏風疊乘鸞着玉鞭一本作鞭不着鞭

贈內

三百六日日日日醉如泥雖為李白婦何異

太常妻齊賢曰後漢周澤為太常卧病齋宮其妻哀澤老病窺問所苦澤大怒以為干犯齋禁收送詔獄時人語曰生世不諧作太常妻一年三百六十一日不齋醉如泥

在潯陽非所寄內

聞雞知慟哭行啼入府中多君同蔡琰流淚

請曹公知登吳章嶺昔與死無分崎嶇行石

道外折入青雲相見若悲嘆哀聲那可聞齊賢

曰蔡琰再嫁董祀時為曹操屯田都尉犯法當死文姬詣操請之時公卿名士滿堂操曰蔡伯喈女在外今為諸公見之及進蓬首徒行叩頭請罪音辭清辨旨甚酸哀公曰文狀已去柰何姬曰公廐馬萬匹虎士成林何惜疾足一騎而不濟垂死之命乎公感其言追原祀

### 南流夜郎寄內

夜郎天外怨離居  
明月樓中音信疎  
北鴈春歸看欲盡  
南來不得豫章書

### 越女詞五首

長干吳兒女  
眉目艷星月  
袂上足如霜  
不着

鴉頭襪

齊賢曰長干見前士贇曰莊子云眉目顏色之好

### 其二

吳兒多白皙  
好為蕩舟劇  
賣藥擲春心  
折花

調行客

齊賢曰毛詩註皙白色也

### 其三

耶溪採蓮女  
見客棹歌迴  
笑入荷花去  
佯羞不出來

齊賢曰越州若耶溪徐浩改為五雲溪

其四

東陽素足女會稽素舸郎相看月未墮白地

斷肝腸

齊賢曰唐姿州東山郡越州會稽郡

其五

鏡湖水如月耶溪女如雪新粧蕩新波光景

兩奇絕

齊賢曰明皇賜賀知章鏡湖剡淡一曲

浣紗石上女

玉面耶溪女青娥紅粉妝一雙金齒後兩足

白如霜

示金陵子

一作金陵子詞

金陵城東誰家子竊聽琴聲碧牕裏落花一

片天上來隨人直度西江水楚歌吳語嬌不

成似能未能最有情謝公正要東山妓携手

林泉處處行

齊賢曰漢書註師古曰楚歌者為楚人歌猶言吳歌越吟

出妓金陵子呈盧六四首

安石東山三十春傲然携妓出風塵樓中見

我金陵子何似陽臺雲雨人〔士贇曰〕事並見前

其二

南國新豐酒東山小妓歌對君君不樂花有  
柰愁何〔士贇曰〕事並見前

其三

東道煙霞主西江詩酒筵相逢不覺醉日墮  
歷陽川

其四

小妓金陵歌楚聲家僮丹砂學鳳鳴我亦為  
君飲清酒君心不肯向人傾

巴女詞

巴水急如箭巴船去若飛十月三千里郎行  
幾歲歸

哀傷六首

哭晁卿行

日本晁卿辭帝都征帆一片繞蓬壺明月不

歸沉碧海白雲愁色滿蒼梧

〔士贇曰〕日本國蓬壺碧海蒼梧

白雲等事並見前

### 自溧水道哭王炎三首

宣州

白楊雙行行白馬悲路傍晨興見曉月更似  
發雲陽溧水通吳關逝川去未央故人萬化  
盡閉骨茅山岡天上墜玉棺泉中掩龍章名  
飛日月上義與風雲翔逸氣竟莫展英圖俄  
天傷楚國一老人來嗟龔勝亡有言不可道

雪泣憶蘭芳

〔齊賢曰〕雲陽溧水吳閔未央宮茅山玉棺事並見前晉書嵇康

身長七尺八寸美詞氣有風儀不自藻飾人以為龍章鳳姿天質自然漢書龔勝死時年七十九有老父來弔哭甚哀哀既而曰嗟乎薰以香自燒膏以明自銷龔生竟天天年非吾徒也遂趨而出莫知其誰

### 其二

王公希代寶棄世一何早弔死不及哀殯宮  
已秋草悲來欲脫劍挂向何枝好哭向茅山  
雖未糴一生淚盡丹陽道

〔齊賢曰〕左傳贈死不及尸弔生不及

哀士贊曰季札挂劍徐君墓丹陽茅山事並見前

其三

王家碧瑤樹一樹忽先摧海內故人泣天涯

弔鶴來未成霖雨用先天濟川材一罷廣陵

散鳴琴更不開

齊賢曰世說王戎云太尉神姿高徹如瑤林瓊樹自然是

風塵表物太尉王衍也陶侃母死有二客來弔不哭而退化為雙鶴冲天而去說命曰若

歲大旱用汝作霖雨若濟巨川用汝作舟楫嵇康臨刑曰廣陵散於茲絕矣

哭宣城善釀紀叟

紀叟黃泉裏還應釀老春夜臺無曉日沽酒

與何人

一作題戴老酒店云戴老黃泉下還應醉六春夜臺無李白沽酒與何人

宣城哭蔣徵君華

敬亭埋玉樹知是蔣徵君安得相如草空餘

封禪文池臺空有月詞賦舊凌雲獨挂延陵

劍千秋在古墳

齊賢曰敬亭山隸宣城漢書相如已死家無遺書問其妻曰長卿未常有

書時時書者書人又取去長卿未死時為二卷書曰有使來求書奏之其遺札言封禪事

使者奏焉天子異之相如奏大人賦天子大



說飄飄然有凌雲  
氣遊天地之間意

分類補註李太白詩卷之二十五

分類編次李太白文卷之二十六

吳會郭雲鵬萬程編次

表  
三首書六首總九首

為吳王謝責赴行在遲滯表

臣某言伏蒙聖恩追赴行在臣誠惶誠恐頓  
首頓首臣聞胡馬矯首嘶北風以跼顧越禽  
歸飛戀南枝而刷羽所以流波思其舊浦落  
葉墜於本根在物尚然矧於臣子臣位叨盤

石辜負明時才闕總戎謬當強寇驚拙有素  
天實知之伏惟陛下重紐乾綱再清國步  
臣不逮賜臣生全歸見白日死無遺恨然臣  
年過耳順風瘵日加鋒鏑殘骸劣有餘喘雖  
決力上道而心與願違貴貪尺寸之程轉增  
犬馬之戀非有他故以疾淹留今大舉天兵  
掃除戎羯所在郵驛徵發交馳臣逐便水行  
難於陸進瞻望丹闕心魂若飛慙墜履之還

收喜遺簪之再御不勝涕戀屏營之至謹奉  
表以聞

爲宋中丞請都金陵表

臣某言臣誠惶誠恐頓首頓首臣聞社稷無  
常奉明者守之君臣無定位闇者失之所以  
父作子述重光疊輝天未絕晉人惟戴唐以  
功德有厚薄運數有脩短功高而福祚長永  
德薄而政教陵遲三后之姓於今爲庶非一

朝也伏惟陛下欽六聖之光訓擁千載之鴻  
休有國之本羣生屬望粵自明兩光岐之陽  
昔有周太王之興發跡於此天啓有類豈人  
事歟皇朝百五十年金革不作逆胡竊號剝  
亂中原雖平嵩丘填伊洛不足以掩宮城之  
骸骨決洪河灑秦雍不足以蕩犬羊之羶臊  
毒浸區宇憤盈穹旻此乃猛士奮劍之秋謀  
臣運籌之日夫不拯橫流何以彰聖德不斬

巨猾無以興神功十亂佐周而克昌四兇及  
虞而乃去去元兇者非陛下而誰且道有興  
廢代有中季漢當三七莽亦爲災赤伏再起  
丕業終光非陛下至神至聖安能勃然中興  
乎以臣料人事得失敢獻疑於陛下臣猶望  
愚夫千慮或冀一得何者賊臣楊國忠蔽塞  
天聰屠割黎庶女弟席寵傾國弄權九土泉  
貨盡歸其室怨氣上激水旱荐臻重罹暴亂

百姓力屈即欲平殄螫賊恐難應期且圖萬全之計以成一舉之策今自河以北爲胡所凌自河之南孤城四壘大盜蠶食割爲洪溝宇宙峴岬昭然可覩臣伏見金陵舊都地稱天險龍盤虎踞開局自然六代皇居五福斯在雄圖霸跡隱軫由存咽喉控帶縈錯如繡天下衣冠士庶避地東吳永嘉南遷未盛於此臣又聞湯及盤庚五遷其邑典謨訓誥不

以爲非衛文徙居楚丘風人流詠伏惟陛下因萬人之蕩析乘六合之壽張去扶風萬有一危之近邦就金陵太山必安之成策苟利於物斷在宸衷況齒革羽毛之所生榘枿豫章之所出元龜大貝充物其中銀坑鐵冶連縣相屬剗銅陵爲金穴煮海水爲鹽山以征則兵強以守則國富橫制八極克復兩京俗畜來蘇之歡人多僎后之望陛下西以峨嵋

爲壁壘東以滄海爲溝池守海陵之倉獵長  
洲之苑雖上林五柞復何加焉上皇居天帝  
運昌之都儲精真一之境有虞則北閉劔閣  
南扃瞿塘蚩尤共工五兵莫向二聖高枕人  
何憂哉飛章問安往復巴峽朝發白帝暮宿  
江陵首尾相應率然之舉不勝屏營瞻雲望  
日之至謹先奉表陳情以聞

爲宋中丞自薦表

臣某聞天地閉而賢人隱雲雷屯而君子用  
臣伏見前翰林供奉李白年五十有七天寶  
初五府交辟不求聞達亦由子真谷口名動  
京師上皇聞而悅之召入禁掖旣潤色於鴻  
業或間進於王言雍容揄揚特見褒賞爲賤  
臣詐詭遂放歸山閑居製作言盈數萬屬逆  
胡暴亂避地廬山遇永王東巡脅行中道奔  
走却至彭澤具已陳首前後經宣慰大使崔

渙及臣推覆清雪尋經奏聞臣聞古之諸侯  
進賢受上賞蔽賢受顯戮若三道稱美必九  
錫光榮垂之典謨永以爲訓臣所管李白實  
審無辜懷經濟之才抗巢由之節文可以變  
風俗學可以究天人一命不霑四海稱屈伏  
惟陛下大明廣運至道無偏收其希世之英  
以爲清朝之寶昔四皓遭高皇而不起翼惠  
帝而方來君臣離合亦各有數豈使此人名

揚宇宙而枯槁當年傳曰舉逸人而天下歸  
心伏惟陛下迴太陽之高暉流覆盆之下照  
特請拜一京官獻可替否以光朝列則四海  
豪俊引領知歸不勝悽悽之至敢陳薦以聞  
代壽山荅孟少府移文書

淮南小壽山謹使東峯金衣雙鶴銜飛雲錦  
書于維揚孟公足下曰僕包大塊之氣生洪  
荒之間連翼軫之分野控荆衡之遠勢盤薄

萬古邈然星河憑天霓以結峯倚斗極而橫  
嶂頗能攢吸霞雨隱居靈仙產隋戾之明珠  
蓄卞氏之光寶罄宇宙之美殫造化之竒方  
與崑崙抗行閩風接境何人間巫廬台霍之  
足陳耶昨於山人李白處見吾子移文責僕  
以多竒鄙一作叱僕以特秀而盛談三山五岳  
之美謂僕小山無名無德而稱焉觀乎斯言  
何太謬之甚也吾子豈不聞乎無名為天地

之始有名為萬物之母假令登封禋祀曷足  
以大道譏耶然皆損人費物庖殺致祭暴殄  
草木鐫刻金石使載圖典亦未足為貴乎且  
達人莊生常有餘論以為尺鷃不羨於鵬鳥  
秋毫可並於太山由斯而談何小大之殊也  
又怪於諸山藏國寶隱國賢使吾君榜道燒  
山披訪不獲非通談也夫皇王登極瑞物昭  
至蒲萄翡翠以納貢河圖洛書以應符設天

網而掩賢窮月竈以率職天不祕寶地不藏  
珍風威百蠻春養萬物王道無外何英賢珍  
玉而能伏匿於巖穴耶所謂榜道燒山此則  
王者之德未廣矣昔太公大賢傳說明德棲  
渭川之水藏虞虢之巖卒能形諸兆朕感乎  
夢想此則天道闇合豈勞乎搜訪哉果投竿  
詣麾捨築作相佐周文讚武丁總而論之山  
亦何罪乃知巖穴為養賢之域林泉非祕寶

之區則僕之諸山亦何負於國家矣近者逸  
人李白自峨眉而來爾其天為容道為貌不  
屈已不干人巢由以來一人而已乃蚪蟠龜  
息遁乎此山僕嘗弄之以綠綺臥之以碧雲  
漱之以瓊液餌之以金砂既而童顏益春真  
氣愈茂將欲倚劒天外挂弓扶桑浮四海橫  
八荒出宇宙之寥廓登雲天之渺茫俄而李  
公仰天長吁謂其友人曰吾未可去也吾與



爾達則兼濟天下窮則獨善一身安能食君  
紫霞蔭君青松乘君鸞鶴駕君蚪龍一朝飛  
騰爲方丈蓬萊之人耳此則未可也乃相與  
卷其丹書匣其瑤瑟申管晏之談謀帝王之  
術奮其智能願爲輔弼使寰區大定海縣清  
一事君之道成榮親之義畢然後與陶朱留  
侯浮五湖戲滄州不足爲難矣即僕林下之  
所隱容豈不大哉必能資其聰明輔以正氣

借之以物色發之以文章雖煙花中貧沒齒  
無恨其有山精木魅雄虺猛獸以驅之四荒  
礫裂原野使影跡絕滅不干戶庭亦遣清風  
掃門明月侍坐此乃養賢之心實亦勤矣孟  
子孟子無見深責耶明年青春求我於此巖  
也

上安州李長史書

白嶽崎歷落可笑人也雖然頗嘗覽千載觀

百家至於聖賢相似厥衆則有若似於仲尼  
紀信似於高祖牢之似於無忌宋玉似於屈  
原而遙觀君侯竊疑魏洽便欲趨就臨然舉  
鞭遲疑之間未及迴避且理有疑誤而成過  
一本無此一字事有形似而類真惟大雅含弘方能  
恕之也白少頗周慎忝聞義方入暗室而無  
欺屬昏行而不變今小人履疑誤形似之迹  
君侯流愷悌矜恤之恩戢秋霜之威布冬日

之愛睟容有穆怒顏不彰雖將軍息恨於長  
孫之前此無慙德司空受揖於元淑之際彼  
未爲賢一言見寃九死非謝白孤劒誰託悲  
歌自憐迫於恓惶席不暇暖寄絕國而何仰  
若浮雲而無依南徙莫從北遊失路遠客汝  
海近還邛城昨遇故人飲以狂藥一酌一笑  
陶然樂酣困河朔之清觴飫中山之醇酎屬  
早日初眩晨霾未收乏離朱之明昧王戎之

視青白其眼曹而前行亦何異抗莊公之輪  
怒螳螂之臂御者趨召明其是非入門鞠躬  
精魄飛散昔徐邈緣醉而賞魏王却以為賢  
無鹽因醜而獲齊君待之逾厚白妄人也安  
能比之上挂國風相鼠之譏下懷周易履虎  
之懼慙以固陋禮而遣之幸容甯越之辜深  
荷王公之德銘刻心骨退思狂僭五情冰炭  
罔知所措晝愧於影夜慙於魄啓處不惶戰

跼無地伏惟君侯明奪秋月和均韶風掃塵  
辭場振發文雅陸機作太康之傑士未可比  
肩曹植爲建安之雄才惟堪捧駕天下豪俊  
翕然趨風白之不敏竊慕餘論何圖叔夜潦  
倒不切於事情正平猖狂自貽於耻辱一忤  
容色終身厚顏敢昧負荆請罪門下儻免以  
訓責恤其愚蒙如能伏劔結纓謝君侯之德  
敢以近所爲春遊救苦寺詩一首十韻石巖

寺詩一首八韻上楊都尉詩一首三十韻辭  
旨狂野貴露下情輕于視聽幸乞詳覽

與賈少公書

宿昔惟清勝白絲疾疲薊去期恬退才微識  
淺無足濟時雖中原橫潰將何以救之生命  
崇重大總元戎辟書三至人輕禮重嚴期迫  
切難以固辭扶力一行前觀進退且殷深源  
廬嶽十載時人觀其起與不起以上江左與


亡謝安高卧東山蒼生屬望白不樹矯抗之  
跡耻振玄邈之風混遊漁商隱不絕俗豈徒  
販賣雲壑要射虛名方之二子實有慙德徒  
塵忝幕府終無能為唯當報國薦賢持以自  
免斯言若謬天實殛之以足下深知具申中  
款惠子知我夫何間然勾當小事但增悚惕

一作佩

為趙宣城與楊右相書

某啓辭違積年伏戀軒屏首冬初寒伏惟相  
公尊體起居萬福某蒙恩才朽齒邁徒延聖  
日少忝末吏本乏遠圖中年廢缺分歸園壑  
昔相公秉國憲之日一拔九霄拂刷前耻昇  
騰晚官恩貸稠疊實戴丘山落羽再振枯鱗  
旋躍運以大風之舉假以磨天之翔衣繡霜  
臺含香華省宰劇慙強項之名酌貪礪清心  
之節三典列郡寂無成功但宣布王澤式酬

天獎伏惟相公開張徽猷寅亮天地入夔龍  
之室持造化之權安石高枕蒼生是仰某鳴  
躍無已剪拂因人銀章朱紱坐榮宦達身荷  
宸眷目識龍顏既齊飛於鴛鷺復寄跡於門  
館皆相公大造之力也而鐘鳴漏盡夜行不  
息止足之分實媿古人犬馬戀主迫於西汜  
所冀枯松晚歲無改節於風霜老驥餘年期  
盡力於蹄足上答明主下報相公悽悽之誠



P14

屏息於此伏惟相公收遺簪於少昊念亡弓  
於楚澤衰當益壯結草知歸瞻望恩光無忘  
景刻

與韓荊州書

白聞天下談士相聚而言曰生不用萬戶侯  
但願一識韓荊州何令人之景慕一至於此  
耶豈不以有周公之風躬吐握之事使海內  
豪俊奔走而歸之一登龍門則聲譽十倍所

崔宗之房習祖黎昕許瑩之徒或以才名見  
知或以清白見賞白每觀其銜恩撫躬忠義  
奮發白以此感激知君侯推赤心於諸賢腹  
中所以不歸他人而願委身國士儻急難有  
用敢効微軀且人非堯舜誰能盡善白謨猷  
籌畫安能盡矜至於制作積成卷軸則欲塵  
穢視聽恐雕蟲小技不合大人若賜觀芻蕘  
請給以紙墨兼人書之然後退歸閑軒繕寫

呈上庶青萍結綠長價於薛卞之門幸惟下  
流大開獎飾惟君侯圖之

上安州裴長史書

白聞天不言而四時行地不語而百物生白  
人焉非天地安得不言而知乎敢刻心枿肝  
論舉身之事便當談笑以明其心而粗陳其  
大綱一快憤懣惟君侯察焉白本家金陵世  
爲右姓遭沮渠蒙遜難奔流咸秦因官寓家

少長江漢五歲誦六甲十歲觀百家軒轅以  
來頗得聞矣常橫經籍書制作不倦迄于今  
三十春矣以爲士生則桑弧蓬矢射乎四方  
故知大丈夫必有四方之志乃杖劍去國辭  
親遠遊南窮蒼梧東涉溟海見鄉人相如大  
誇雲夢之事云楚有七澤遂來觀焉而許相  
公家見招妻以孫女便憩跡于此至移三霜  
焉曩昔東遊維揚不逾一年散金三十餘萬



有落魄公子悉皆濟之此則是白之輕財好  
施也又昔與蜀中友人吳指南同遊於楚指  
南死於洞庭之上白禪服慟哭若喪天倫炎  
月伏屍泣盡繼之以血行路聞者悉皆傷心  
猛虎前臨堅守不動遂權殯於湖側便之金  
陵數年來觀筋骨尚在白雪泣持刃躬申洗  
削裹骨徒步負之而趨寢興攜持無輟身手  
遂丐賃營葬於鄂城之東故鄉路遙魂魄無

主禮以遷窆式昭朋情此則是白存交重義  
也又昔與逸人東巖子隱於岷山之陽白巢  
居數年不跡城市養竒禽千計呼皆就掌取  
食了無驚猜廣漢太守聞而異之詣廬親覩  
因舉二人以有道並不起此則白養高忘機  
不屈之跡也又前禮部尚書蘇公出爲益州  
長史白於路中投刺待以布衣之禮因謂群  
寮曰此子天才英麗下筆不休雖風力未成

且見專車之骨若廣之以學可以相如此肩也四海明識具知此談前此郡督馬公朝野豪彥一見盡禮許爲竒才因謂長史李京之曰諸人之文猶山無烟霞春無草樹李白之文清雄奔放名章俊語絡繹間起光明洞徹句句動人此則故交元丹親接斯議若蘇馬二公愚人也復何足陳儻賢賢也白有可尚夫唐虞之際於斯爲盛有婦人焉九人而已

是知才難不可多得白野人也頗工於文惟君侯顧之無按劍也伏惟君侯貴而且賢鷹揚虎視齒若編貝膚如凝脂昭昭乎若玉山上行朗然映人也而高義重諾名飛天京四方諸侯聞風暗許倚劍慷慨氣干虹蜺月費千金日宴群客出躍駿馬入羅紅顏所在之處賓朋成市故時人歌曰賓朋何喧喧日夜裴公門願得裴公之一言不須驅馬埒華軒

白不知君侯何以得此聲於天壤之間豈不  
由重諾好賢謙以得也而晚節改操棲情翰  
林天才超然度越作者屈佐鄭國時惟清哉  
稜威雄雄下憎群物白竊慕高義已經十年  
雲山間之造謁無路今也運會得趨末塵承  
顏接辭八九度矣常欲一雪心跡崎嶇未便  
何圖謗言忽生衆口攢毀將恐投杼下客震  
於嚴威然自明無辜何憂悔吝孔子曰畏天

命畏大人畏聖人之言過此三者鬼神不害  
若使事得其實罪當其身則將浴蘭沐芳自  
屏於烹鮮之地惟君侯死生不然投山竄海  
轉死溝壑豈能明目張膽託書自陳耶昔王  
東海問犯夜者曰何所從來答曰從師受學  
不覺日晚王曰吾豈可鞭撻甯越以立威名  
想君侯通人必不爾也願君侯惠以大遇洞  
開心顏終乎前恩再辱英眄白必能使精誠

動天長虹貫日直度易水不以爲寒若赫然  
作威加以大怒不許門下遂之長途白即膝  
行於前再拜而去西入秦海一觀國風永辭  
君侯黃鵠舉矣何王公大人之門不可以彈  
長劔乎

分類編次李太白文卷之二十六

分類編次李太白文卷之二十七

序上 一十首

暮春江夏送張祖監丞之東都序

吁咄哉僕書室坐愁亦已久矣每思欲遐登  
蓬萊極目四海手弄白日頂摩青穹揮斥幽  
憤不可得也而金骨未變玉顏已緇何常不  
捫松傷心撫鶴歎息誤學書劔薄遊人間紫  
微九重碧山萬里有才無命甘於後時劉表

不用於禰衡暫來江夏賀循喜逢於張翰且  
樂船中達人張侯大雅君子統泛舟之役在  
清川之湄談玄賦詩連興數月醉盡花柳賞  
窮江山王命有程告以行邁烟景晚色慘爲  
愁容繫飛帆於半天泛淶水於遙海欲去不  
忍更開芳樽樂雖寰中趣逸天半平生酣暢  
未若此筵至於清談浩歌雄筆麗藻笑飲醪  
酒醉揮素琴余實不愧於古人也揚袂遠別  
可贈遠無乃闕乎

奉餞十七翁二十四翁尋桃花源序

昔祖龍滅古道嚴威刑煎熬生人若墜大火  
三墳五典散爲寒灰築長城建阿房并諸侯  
殺豪俊自謂功高義皇國可萬世思欲凌雲  
氣求仙人登封太山風雨暴作雖五松受職  
草木有知而萬象乖度禮刑將弛則綺皓不

得不遁於南山魯連不得不蹈於東海則桃源之避世者可謂超昇先覺夫指鹿之儔連頸而同死非吾黨之謂乎二翁耽老氏之言繼少卿之作文以述大雅道以通至精卷舒天地之心脫落神仙之境武陵遺跡可得而窺焉問津利往水引漁者死藏仙谿春風不知從來落英何許流出石洞來入晨光盡開有良田名池竹果森列三十六洞別爲一天耶今扁舟而行笑謝人世阡陌未改古人依然白雲何時而歸來青山一去而誰往諸公賦桃源以美之

夏日陪司馬武公與群賢宴姑熟亭

序

通驛公館南有水亭焉四甍翬飛巉絕浦嶼蓋有前攝令河東薛公棟而宇之今宰隴西李公明化開物成務又橫其梁而閣之晝鳴

閑琴夕酌清月蓋爲接輿軒祖遠客之佳境也製置旣久莫知何名司馬武公長材博古獨映方外因據胡牀岼憤嘯詠而謂前長史李公及諸公曰此亭跨姑熟之水可稱爲姑熟亭焉嘉名勝槩自我作也且夫曹官紱冕者大賢處之若遊青山卧白雲逍遙偃傲何適不可小才居之窘而自拘悄若桎梏則清風朗月河英嶽秀皆爲棄物安得稱焉所以

司馬南隣當文章之旗鼓翰林客卿揮辭鋒以戰勝名教樂地無非得俊之場也千載一時言詩紀志

### 江夏送林公上人遊衡嶽序

江南之仙山黃鶴之爽氣偶得英粹後生俊人林公世爲豪家此土之秀落髮歸道專精律儀白月在天朗然獨出旣灑落於彩翰亦諷誦於人口閑雲無心與化借往欲將振五

樓之金策浮三湘之碧波乘杯泝流考室名  
嶽瞰憩冥壑凌臨諸天登祝融之峰巒望長  
沙之烟火遥謝舊國誓遺歸蹤百千開士稀  
有此者余所以歎其峻節揚其清波龍象先  
輩迴眸拭視比夫汨泥沙者相去如牛之一  
毛昔智者安禪於台山遠公托志於廬嶽高  
標勝槩斯亦嚮慕哉紫霞揺心青楓夾岍目  
斷川上送君此行群公臨流賦詩以贈

金陵與諸賢送權十一序

斯高柄秦嬴世不二三傑伏草與漢並出莽  
夷朱暉耿鄧乃起自古英達未必盡用於當  
年去就之理在大運爾我君六葉繼聖熙乎  
玄風三清垂拱穆然紫極天人其一哉所以  
青雲豪士散在商釣四坐明哲皆清朝旅人  
吾希風廣成蕩漾浮世素受寶訣為三十六  
帝之外臣即四明逸老賀知章呼余為謫仙



人蓋實錄耳而嘗採姹女於江華收河車於清溪與天水權昭夷服勤爐火之業久矣之子也冲恬淵靜翰才峻發白每一篇一札皆昭夷之所操吁捨我而南若折羽翼時歲律寒苦天風枯聲雲帆涉漢罔若絕雷舉目四顧霜天崢嶸銜杯叙離群子賦詩以出餞酒仙翁李白辭

春於姑孰送趙四流炎方序

白以鄒魯多鴻儒燕趙饒壯士蓋風土之然乎趙少翁才貌瓌雅志氣豪烈以黃綬作尉泥蟠當塗亦雞棲鶴籠不足以窘束鸞凰一作

鳳耳以疾惡抵法遷于炎方辭高堂而墜心

指絕國以搖恨天與水遠雲連山長借光影於頃刻開壺觴於洲渚黃鶴曉別愁聞命子之聲青楓暝色盡是傷心之樹然自吳瞻秦日見喜氣上當攫玉弩摧狼狐洗清天地雷

雨必作冥白日迴照丹心可明巴陵半道坐  
見還吳之棹令雪解而松栢振色氣和而蘭  
蕙開芳僕西登天門望子於西江之上吾賢  
可流水其道浮雲其身通方大適何往不可  
何戚戚於路歧哉

秋於敬亭送從姪耑遊廬山序

余小時大人令誦子虛賦私心慕之及長南  
遊雲夢覽七澤之壯觀酒隱安陸蹉跎十年

初嘉興季父謫長沙西還時余拜見預飲林  
下耑乃稚子嬉遊在傍今來有成鬱負秀氣  
吾衰久矣見爾慰心申悲導舊破涕爲笑方  
告我遠涉西登香爐長山橫蹙九江却轉瀑  
布天落半與銀河爭流騰虹奔電灑射萬壑  
此宇宙之奇詭也其上有方湖石井不可得  
而窺焉羨君此行撫鶴長嘯恨丹液未就白  
龍來遲使秦人著鞭先往桃花之水孤負夙

願慙歸名山終期後來携手五嶽情以送遠  
詩寧闕乎

送黃鍾之鄱陽謁張使君序

東南之美者有江夏黃公焉白竊飲風流始  
接談笑亦有抗節玉立光輝炯然氣高時英  
辦折天口道可濟物志棲無垠鄱陽張公朝  
野榮望愛客接士即原嘗春陵之要焉每欽  
其辭華懸榻見往而黃公因訪古跡便從貴

遊乃僞裝撰行去國遐陟諸子銜酒惜別沽  
巾贈分沉醉烟夕惆悵涼月天南迴以變夏  
火西飛而獻秋汀葭颯然海草微落夫子行  
邁我心若何母金玉爾音而有遐心湖水演  
沔勗哉是行共賦武昌釣臺篇以慰別情耳  
早春於江夏送蔡十還家雲夢序

吾觀蔡侯奇人也爾其才高氣遠有四方之  
志不然何周流宇宙太多耶白遐窮冥搜亦

已早矣海草三綠不歸國門又更逢春再結  
鄉思一見夫子冥心道存窮朝晚以作宴驅  
煙霞以輔賞朗笑明月時眠落花斯遊無何  
尋告睽索來暫觀我去還愁人乃浮漢陽入  
雲夢鄉榭云叩歸魂亦飛且青山綠楓累道  
相接遇勝因賞利君前行既非遠離曷足多  
嘆秋七月結遊鏡湖無憊我期先子而往敬  
慎好去終當早來無使晚耶白雲不得復弄

爾鄉中廖公及諸才子爲詩略謝之

秋日於太原南柵餞陽曲王贊公賈  
少公石艾尹少公應舉赴上都序

天王三京北都居一其風俗遠蓋陶唐氏之  
人歟襟四塞之要衝控五原之都邑雄藩劇  
鎮非賢莫居則陽曲丞王公神仙之胄也爾  
其學鏡千古知周萬殊又若少府賈公以述  
作之雄也鼇弄筆海虎攫辭場又若石艾尹

少公廊廟之器口折黃馬手揮青萍咸道貫  
於人倫名飛於日下實難沈屈永懷青霄劍  
有隱而氣衝七星珠雖潛而光照萬壑今年  
春皇帝有事于畝湛恩八埏大搜群才以緝  
邦政而王公以令宰見舉賈公以王霸昇聞  
海激佇乎三千天飛期於六月必有以也豈  
徒然哉有從兄太原主簿舒才華動時規謀  
匠物乃點翠幕筵虹梁瓊羞霞開羽觴電舉

然後抗目遠覽憑軒高吟屏俗事於煩襟結  
浮歡於落景俄而皓月生海來窺醉容黃雲  
出關半起秋色數君乃輟酌慷慨揺心促裝  
望丹闕而非遠揮玉鞭而且去白也不敏先  
鳴翰林幸叨玳瑁之筵敢竭麒麟之筆請各  
探韻賦詩寵行

分類編次李太白文卷之二十七

公卿大夫士大夫卷之二十七

耕籍相精廣行

即解林幸以准門之

聖丹聖前非受非

聖關中

聖爐

然外非

